

## COLUMNÀ

# Francesca

RITA CATHOMAS-BEARTH

**F**rancesca che nettegia chasas en blers quartiers da nossa citad na sa lascha betg vaccinar. Pli gugent porta ella l'entir di la mاسcrina e pli gugent paja ella sezza il test da certificat. Quai na l'emportia nagut. Ella che sto volver mintga da tschintg dapi che ses um l'ha bandunà. Dapi passa 20 onns viva ella en Svizra, discorra mo malamain tu-descht e lascha encrescher per la Calabria. Ma returnar na vul ella tuttina betg.

**L**a politica en l'Italia oc-cupa ella mintga giada che nus ans sctrain. I saja in desaster, politicras e politichers sajan canaglias, a quels na crai ella nagut. Avant in temp ha ella votà per Cinque Stelle, ussa fiss ella per Salvini. Ma atgnomain avess l'Italia tenor ella basegn d'in Mussolini. «Insatgi che fa urden».

**F**rancesca è ina buna dunna, lavurusa, seriusa e religiusa. Cur che mias ro-sas flureschan, ma suppli-tgescha ella mintgamai per ina flur per sia Madonna. Sche jau dumond, co ch'i gajja cun ella, respunda ella adina il medem: «Sto bene, grazie». E suenter in suspir: «Speriamo che rimanga così – se il buon Dio lo vuole.»



E cur ch'jau giavisch ad ella dend adia «tutto il meglio» respunda ella adina il medem: «Grazie – se il buon Dio lo vuole».

**M**a daco quella tenuta stinada vers la vaccinaziun? Motivs na numna Francesca betg. Èsi la chasschun da finalmain pudair sezza decider insatge sur da sasezza? Ella ch'è vegnida maltractada da ses bab autoritar ed aggressiv, sco ella raquinta. Co va quai ensemble: desiderar ina dictatura, ma betg tadlar sin ils cussegls da noss politichers e medis? Reclamar per sa-sezza la libertad e desiderar ch'ella ed ils auters stoppian star sut?

**R**espotas na dat Francesca naginas. Ella n'è betg disada da discutar, mabain da lavurar e da far

quai che la vegn cumandà. Er en il cas da Covid para ella da spetgar la voluntad da l'autoritad suprema, da Dieu, e quella stat sur tuttas autoritads profanas. Ella n'è ni cunter ni per la le-scha da Covid. Da la politica è ella simplamain dischillusuniada.

**A**vant curt hai jau puspè scuntrà Francesca. Suenter lung temp. Ella era strusch d'enconuscher pli. Pallida en fatscha, la vestgadirà pendeva. Sia vusch d'antruras franca ed auta tunava mo brausel. Trair flad gieva vess. Ella saja stada malsauna, en l'ospital ed alura en ina chasa da tgira. Suletta a chasa na gievi betg. Uss haja ella cumenzà a lavurar. Ma bleras da sias patrunas hajan dentant pladì novas nettegiunzas e na dovrian betg pli ella.

**J**au n'hai betg dumandà il num da sia malsogna. Er ella n'ha ditg nagut. Ma sco mia vischina di, na possia Francesca betg lavurar sco pli baud. Ella ch'era svelta e precisa, saja daventada plauna e malsegira. Uss pon ins mo sperar che Francesca sa revegnia plaun a plaun, «Se il buon Dio lo vuole».

Rita Cathomas-Bearth è oriunda da Rabius, viva a Cuira, è pensiunada e lavura gugent cun il linguatg.